

## 2 TÉSALONIKA

### Ini Sa Keduwa Igsulat I Pabelo Diyà Sa Umpungan I Hésus Diyà Tésalonika

**Ini Denu Sa Keduwa Igsulat I Pabelo Diyà Sa Medoo TegeTésalonika**

*Na, diyà siini sulat, tinulon i Pabelo diyà sa medoo tegeTésalonika sa egoh di neamu sa penemdem da denu sa kepelikù i Hésus Kelistu. Igtulù di diyà kenagda sa egoh i Kelistu endà pa pelikù, dumuen sa etaw tumbow sa datù atung tegekuntelà si Nemula. Agaken di sa langun etaw endà epgigtuu diyà si Hésus anè mael da medaet, owoy tigtu meumanan sa kebael da salà.*

*Na, tinulù i Pabelo kagda anè gumalebek da. Endà mepion di amuk pauken da, dodoo mepion polo amuk gumalebek da anè dumuen kaenen da. Sinasà di ma kagda anè peelesen da sa kepigttuu da diyà si Hésus, apiya di pa egkepelihay da. Owoy sinasà di ma kagda anè takà da egbael mepion diyà sa medoo дума da epgigtuu, owoy pepionen da ma sa adat da.*

**Ini Sa Edungan Kagi I Pabelo  
Diyà Sa Medoo TegeTésalonika**

**1** Na, si Pabelo a egsulat ini i owoy si Silas owoy si Timotiyu. Egsulat ké diyà keniyu, sa umpungan i Hésus diyà sa menuwa Tésalonika, sa medoo epgigtuu diyà sa Emà ta si Nemula owoy diyà si Datù Hésus Kelistu.

**2** Egsimbà ké anè mekehaa yu sa mepion ketabang ipeuloy i Nemula owoy sa melanah keugpà yu danà sa Emà ta si Nemula owoy si Datù Hésus Kelistu.

**Ini Denu Sa Keligela I Nemula  
Amuk Pelikù Si Datù**

**3** Na, o medoo дума ké epgigtuu, egsalamat ké diyà si Nemula denu keniyu, enù ka tigtu subela sa kelenuk sa kepigttuu yu owoy egkedakel ma sa kesehiduway yu. **4** Huenan di, eg-oloen ké kiyu temù diyà sa langun umpungan i Nemula danà sa ketigkel yu owoy sa keeles kepigttuu yu, apiya di pa tigtu yu egkepelihay owoy egkepasangan yu ma.

**5** Na, sa ketigkel yu, iya sa ketuu di metudà sa keligela i

Nemula langun etaw diyà sa sabuhanan agdaw, enù ka danà yu egtigkel sa medoo kelikutan egkeukitan yu, ipetiig i Nemula doo netuuwan diyà keniyu anì mekeunut yu sa kedadù di.

6Anan metudà sa baelan i Nemula, huenan di pigtamayan di sa etaw egpelihay keniyu,

7owoy lengaan di kiyu lapeg kami ma diyà sa medoo kelikutan ta anì mekeetud ki. Iya sa baelan di amuk pehaa Datù Hésus i kedu diyà langit. Éhê kelegleg apuy sa egoh-egoh di owoy unutan sa medoo egsugùsuguen i Nemula épê dakel egkegaga.

8Amuk pehaa, pigtamayan di sa medoo etaw endà egpeketiig da si Nemula owoy sa medoo etaw eg-eked egpangunut diyà sa Mepion Tegudon denu si Hésus, sa Datù ta.

9Mepasangan da humaa sa kepigtamay i Nemula enù ka endà meelut di sa sugug da owoy mekeliyu da ma diyà sa kenà i Datù owoy diyà sa dakel egkegaga di mekegaip etaw.

10Amuk tumebow Datù i diyà siedò agdaw di pehaa, kagdi doo sa pedakelen sa langun etaw di owoy sa oloen sa langun etaw epgigtuu. Amuk hediya, mekelapeg yu ma diyà kenagda enù ka pinigtuu yu ma dé sa tegudon tinulon ké diyà keniyu.

11Iya sa pesuwan di isimbà ké kiyu takà. Egpegeni ké diyà si Nemula sa ketabang di keniyu

anì metuuwan diyà sa keunut yu sa pesuwan di mig-umow keniyu. Isimbà ké ma sa kebegay di tunung anì metuu sa langun mepion ungayà yu owoy megulub ma sa langun egbaelan yu danà sa kepigtuu yu.

12Amuk hediya, meolò Hésus Kelistu i, sa Datù ta, danà yu, owoy meolò yu ma danà di. Metuu doo iya wé danà sa mepion ketabang ipeuloy i Nemula owoy si Datù Hésus Kelistu.

#### **Ini Denu Sa Datù Atung Tegekuntelà Si Nemula**

**2** 1Na, ini denu sa kepelikù i Hésus Kelistu, sa Datù ta, owoy denu sa egoh ta mesetipon tumelabuk kenagdi. Egpegeni ké diyà keniyu, o medoo дума ké epgigtuu, 2anì endà melemu egkehalihalì sa pedu yu ataw ka mebogo yu danà sa dinineg yu migtebow dé gaa sa agdaw i Datù pehaa. Sumalà dé sa kenà yu egdineg iya wé, iling ka diyà sa etaw egsugkow gaa sa kagi i Nemula, ataw ka diyà sa sebaen etaw egtulù, ataw ka diyà sa igsulat guwaen da dò kedu diyà kenami, yoko epgigtuu duu enù ka beken pa iya sa agdaw i Datù pehaa.

3Tulik yu polo anì endà meakalan yu, enù ka endà pa meketebow siedò agdaw i Hésus taman endà muna di tumebow sa agdaw kekuntelà temù sa medoo etaw diyà si Nemula

owoy pehaa ma sa datù atung tegekuntelà si Nemula, sa maama mepigtamayan diyà sa lanaw apuy. <sup>4</sup>Dodoo muna pelà kuntelaen di Nemula i owoy sa langun balangan egpenemulawen etaw, owoy pedakelen di kagdi diyà langun da, enù ka mangay menuu diyà sa penuuwan i Nemula dalem sa Dalesan i Nemula, owoy guwaen di kagdi gaa si Nemula. <sup>5</sup>Na, egoh ku pelà diyà keniyu, tinulon ku iya wé diyà keniyu. Enù di ya, netulengan yu pa?

<sup>6</sup>Na, netiigan yu ma duen sa eg-alang siedò maama taman endà tumbow sa pasad di pehaa diyà sa medoo etaw. <sup>7</sup>Duen pelawà diyà tanà sa penemdem sa medoo etaw egkuntelà si Nemula, dodoo duen ma sa eg-alang sa penemdem da. Endà mekeukit sa penemdem da taman endà mekedan sa eg-alang. <sup>8</sup>Dodoo amuk mekedan dé sa eg-alang, pehaa ma dé sa maama atung tegekuntelà si Nemula. Agulé, amuk tumbow Datù Hésus i, imatayan di kagi di daa iya wé maama owoy atuwan di anì tigtu mekesugsug danà sa senang di daa.

<sup>9</sup>Na, amuk pehaa siedò maama atung tegekuntelà si Nemula, tunungan danà i Satanas anì mekebael medoo panduan endà tuu owoy sa medoo tandà mekeakal etaw. <sup>10</sup>Danà sa medoo medaet

penemdem di, meakalan di sa medoo etaw mekesugsug. Mekesugsug da doo enù ka eg-ekedan da egpigtuu sa tuu tegudon, sa ialuk i Nemula kenagda hedem. <sup>11</sup>Iya maen di ya duen sa peangayen i Nemula diyà kenagda anì meakalan da temù anì pigtuuwen da dé sa butbut. <sup>12</sup>Huenan di, tigtu mepigtamayan doo sa langun etaw endà egpigtuu sa tuu tegudon, enù ka iya polo sa pedakelan pedu da sa medoo medaet egbaelan da.

#### **Egsasà Pabelo I Kenagda Anì Peelesen Da Sa Kepigtuu Da**

<sup>13</sup>Na, takà ké egpesalamat diyà si Nemula denu keniyu, o medoo duma ké eghiduwan i Datù, enù ka egoh di endà pa duen tanà, tapay dé hinemilì i Nemula kiyu anì mealukan yu danà sa kepetiengaw sa Suguy di keniyu owoy danà sa kepigtuu yu sa tuu tegudon.

<sup>14</sup>Iya sa pesuwan di inumow di kiyu danà sa ketulù ké keniyu sa Mepion Tegudon, enù ka ungayà di mekeunut yu ma sa senang i Datù Hésus Kelistu.

<sup>15</sup>Huenan di, o medoo duma ké egpigtuu, peeles yu takà sa kepigtuu yu, owoy peeles yu ma sa medoo igtulù ké, iling ka sa tinegudon ké ataw ka sa igsulat ké.

<sup>16</sup>Na, egsimbà ké anì mekehaa yu sa ketabang i Datù Hésus Kelistu owoy si Nemula

sa Emà ta, sa mehidu kenita owoy sa egbegay diyà kenita sa metéél pedu ta endà meelut di owoy sa mepion eg-angat-angatan ta. Ibegay di iya wé danà sa mepion ketabang ipeuloy di. <sup>17</sup>Ungayà ké pebagelen da sa pedu yu owoy peelesen da ma anì anan mepion sa langun egbaelan yu owoy sa langun eg-ikagiyen yu ma.

**Ini Sa Egoh I Pabelo Egpegeni Sa Kesimbà Da Kenagda**

**3** <sup>1</sup>Na, o medoo дума ké egpigtuu, simbai yu kami anì medelamet mekeseluh sa kagi i Datù diyà sa medoo etaw owoy kumedakel ma diyà sa kehaa da lagà mendaa sa kedakel di diyà keniyu. <sup>2</sup>Simbai yu ma anì alukan i Nemula kami diyà sa medoo medaet etaw egdupang, enù ka duen pa medoo etaw eg-eked egpigtuu.

<sup>3</sup>Dodoo kesaligan doo Datù i. Huenan di, netiigan ta pebagelen di sa kepigtuu yu owoy tulikan di kiyu anì endà meatuwan i Satanas kiyu. <sup>4</sup>Danà ké egsalig diyà si Datù, netiigan ké endà dé sumabuh yu egpangunut diyà sa medoo igsugù ké.

<sup>5</sup>Na, egsimbà ké anì meagak i Datù kiyu anì uman yu pa meketiig sa kehidu i Nemula, anì mekeiling yu sa ketigkel i Kelistu.

**Egsasà Pabelo I Kenagda Anì Endà Eggpauk Da**

<sup>6</sup>Na, o medoo дума ké egpigtuu, ini sa igsugù ké diyà keniyu danà i Hésus Kelistu, sa Datù ta. Yoko egpehaa ya adat diyà sa дума yu egpigtuu amuk pauken da owoy endà ma eg-ilingan da duu sa adat igtulù ké diyà keniyu.

<sup>7</sup>Netiigan yu doo sa mepion mebaelan yu anì ilingan yu kami. Egoh ké eg-ugpà diyà keniyu, endà migpauk ké.

<sup>8</sup>Endà ma migpegastu ké diyà keniyu, dodoo binayadan ké polo sa langun ungayà ké.

Sigep owoy agdaw anan ginalebek ké taman egkeliteg ké anì endà egkelikutan yu danà sa kegastu yu kenami.

<sup>9</sup>Apiya di pa duen sa egkegaga ké egpegastu diyà keniyu, eggalebek ké doo anì meilingan yu sa adat ké mepion.

<sup>10</sup>Taa yu. Egoh ké diyà keniyu, iya sa igsugù ké, guwaen ké, “Amuk duen sa etaw diyà keniyu eg-eked eggalebek, mepion amuk endà pekaenen yu duu.” <sup>11</sup>Isulat ké ini i, enù ka egdinegen ké duen etaw diyà keniyu pauken.

Endà dé eggalebek da, dodoo egbogowen da daa sa egbaelan sa medoo дума yu. <sup>12</sup>Na, ini sa isasà ké diyà siini etaw pauken danà sa egkegaga ké ibegay i Hésus Kelistu, sa Datù ta. Petanà yu sa pedu yu owoy

udes yu ma galebek anì  
megastuwan yu kiyu.

13Dodoo kiyu, o medoo  
duma ké egpigtuu, yoko  
egkesemek ka egbael mepion.

14Amuk duen etaw diyà keniyu  
eg-eked egpangunut sa kagi ké  
diyà siini sulat ké, tinudui yu  
owoy yoko egpehaa ya adat  
diyà kenagdi anì memalaan.

15Dodoo, yoko daa egkelepuh  
duu kagdi lagà sa kuntelà yu.  
Tulù yu polo lagà sa ketulù yu  
sa hadi yu.

**Ini Sa Sabuhanan Kagi I Pabelo  
Diyà Sa Medoo TegeTésalonika**

16Na, si Datù sa keduwan sa  
pedu ta metanà, huenan di  
egsimbà ké anì petanaen di takà  
sa pedu yu, sumalà dé sa mehaa  
yu. Egsimbà ké ma anì  
umunut-unut Datù i diyà  
keniyu.

17Na, aken si Pabelo egsulat  
siini hudihudi sulat. Endà  
igsalig ku duu, enù ka ini sa  
tandà diyà sa langun igsulat ku  
anì metuuwan yu danà ku ini i.

18Na, egsimbà ké anì  
mekehaa yu langun sa mepion  
ketabang ipeuloy i Hésus  
Kelistu, sa Datù ta.

Na, taman iya daa sa kagi ké.  
Si Pabelo